

**ԸՆՏԱՆԵԿԱՆ ԿԱՐԾՐԱՏԻՊԵՐԻ ԴԵՐԸ ԾՆՈՂ-ԵՐԵԽԱ
ՓՈԽՀԱՐԱՔԵՐՈՒԹՅՈՒՆՆԵՐԻ ԿԱՌՈՒՑՎԱԾՔՈՒՄ**

Լ. Ն. ՔՈՒՐՔՅԱՆ

Մանկավարժական գիտությունների թեկնածու, դոցենտ

ԳՊՀ դասախոս

Ա. Վ. ՎԱՀԱՆՅԱՆ

*«Հայրուսակ» համալսարանի հումանիտար ֆակուլտետի
մանկավարժության և հոգեբանության ամբիոնի ասիստենտ*

Կարծրատիպերը (ստերեոտիպեր) գիտակցության կառուցվածքի անբաժանելի տարրերն են: Դժվար է պատկերացնել, որ առօրյա կյանքում անձը կարող է ստեղծագործաբար արձագանքել բոլոր իրավիճակներին: Կարծրատիպը խմբի որոշակի կուտակված, ստանդարտացված փորձն է, որն ուսուցման գործընթացի և այլոց հետ շփման շնորհիվ արմատացած է անհատի մեջ, օգնում է նրան կողմնորոշվել կյանքում և որոշակի ձևով ուղղորդում է նրա վարքագիծը: Սակայն կարծրատիպը կարող է լինել ինչպես իրական, այնպես էլ կեղծ: Այն կարող է առաջացնել և՛ դրական, և՛ բացասական ապրումներ՝ արտահայտելով տվյալ սոցիալական խմբի հաստատուն վերաբերմունքը որոշակի երևույթի նկատմամբ:

Մենք բոլորս ապրում ենք կարծրատիպերի աշխարհում: Հենց կարծրատիպերն են զգալի չափով սահմանում բարոյական նորմերը, ձևավորում քաղաքական և աշխարհայացքային կոնցեպցիաները: Վարքագծային կարծրատիպերը շատ բազմազան են և շատ հարցերում որոշում են մեր վարքագիծը, համոզմունքները և վերաբերմունքը շրջապատի նկատմամբ: Շնորհիվ այդ կարծրատիպերի՝ մենք հստակ գիտենք՝ ինչպես մեզ դրսևորենք այս կամ այն դեպքում: Ճանաչողության մեխանիզմում կարծրատիպերի գոյությունը կրում է երկու՝ միմյանց հակադիր բնույթ: Մի կողմից կարծրատիպերը զգալիորեն հեշտացնում են իմացության գործընթացը՝ թույլ տալով լայնորեն օգտագործել գոյություն ունեցող գիտելիքները և կարողությունները, մյուս կողմից՝ հենց դրանք են սահմանափակում իրենց հակասող կամ իրենց շրջանակներից դուրս եկող նոր հասկացությունների ճանաչման հնարավորությունները:

Ձևավորված կարծրատիպերը շատ կայուն են և հաճախ պահպանվում են մարդու ամբողջ կյանքի ընթացքում, դրանց ոչնչացումը սովորաբար շատ ցավոտ գործընթաց է և իր հետ բերում է անհանգստության զգացում, հոգեկան հավասարակշռվածության խանգարում, նույնիսկ սթրեսային իրավիճակ: Նորի նկատմամբ անտագոնիստական վերաբերմունքը որոշվում է ենթագիտակցական մակարդակում գործող ինքնապահպանման բնագոյով, որը փորձում է պաշտպանել մեզ հնարավոր ցնցումներից՝ կապված հաստատված կարծրատիպերի ոչնչացման հետ: Գոյություն ունեն կարծրատիպերի բազմազան տեսակներ: Մասնավորապես առանձնացնում են ավտոկարծրատիպերը, որոնք արտացոլում են մարդկանց պատկերացումները հենց իրենց մասին, և հետերոկարծրատիպերը, որոնք արտացոլում են մեկ այլ ժողովրդի, սոցիալական խմբի մասին պատկերացումները: Շատ կարծրատիպեր մարդիկ ընդունում են որպես օրինակելի օրինակներ, որոնց պետք է պարզապես համապատասխանել: Այդ պատճառով այդպիսի ամրագրված պատկերացումները բավականին մեծ ազդեցություն են գործում մարդկանց վրա՝ խթանելով բնավորության այնպիսի գծերի ձևավորմանը, որոնք արտացոլված են կարծրատիպերում:

Կարծրատիպերը կարող են լինել անհատական և սոցիալական, որոնք արտահայտում են ամբողջ խումբ մարդկանց պատկերացումները: Դրանք կարելի է նաև բաժանել հետևյալ կերպ՝ վարքագծի կարծրատիպեր և գիտակցության կարծրատիպեր: Վարքագծի կարծրատիպերը կայուն սոցիալ-մշակութային խմբի և դրան պատկանող անհատների պարբերաբար կրկնվող վարքագծեր են, որոնք կախված են այդ խմբում գործող արժեքային-նորմատիվ համակարգից և գտնվում են սերտ կապի մեջ գիտակցության կարծրատիպերի հետ: Գիտակցության կարծրատիպերը՝ որպես արժեքային-նորմատիվ համակարգի մասին ամրագրված իդեալական պատկերացումներ, հանդես են գալիս որպես վարքագծի կարծրատիպերում ձևավորման հիմքեր: Գիտակցության կարծրատիպերը ստեղծում են վարքի մոդելներ, իսկ վարքագծի կարծրատիպերը այդ մոդելները ներդնում են կյանք:

Կարծրատիպերի վերլուծության ժամանակ անհրաժեշտ է հաշվի առնել դրանց ինչպես բացասական, այնպես էլ դրական հոգեբանական հետևանքները: Մի կողմից՝ այլ մարդու մասին կարծրատիպից դուրս եկող

դատողությունների համակարգը հաճախ գործում է որպես զգուշացում: Առաջանալով տեղեկատվության պակասի պայմաններում՝ կարծրատիպը հաճախ կեղծ է և խաղում է պահպանողական դեր՝ ձևավորելով սխալ պատկերացումներ տեղի ունեցող իրադարձությունների մասին, ձևափոխելով տեղի ունեցող իրադարձության կամ միջանձնային փոխհարաբերությունների բնույթի մեկնաբանման գործընթացը: Ցանկացած սոցիալական կարծրատիպ, որը ճիշտ է մի իրավիճակում, կարող է համարվել ոչ ճիշտ մեկ այլ իրավիճակում և, հետևաբար, ոչ արդյունավետ շրջապատող սոցիալական աշխարհում անձի կողմնորոշման խնդրի լուծման համար:

Այուս կողմից՝ սոցիալական կարծրատիպերի գոյությունը կարևոր դեր է խաղում կյանքում այն պարզ պատճառով, որ տեղի ունեցող իրադարձության մասին համակողմանի տեղեկատվության բացակայության դեպքում հնարավոր չէր լինի դրա ո՛չ համարժեք գնահատումը, և ո՛չ էլ դրա կանխատեսումը: Կարծրատիպը թույլ է տալիս խիստ կրճատել փոփոխվող իրականության արձագանքման ժամանակը, արագացնել ճանաչման գործընթացը, պատկերացնել գոնե ինչ-որ մի նախնական հիմք՝ տեղի ունեցող իրադարձությունում կողմնորոշվելու համար: Այն հեշտացնում է ըմբռնումը, օրինակ, որքան տեքստում շատ են կարծրատիպերը, այնքան այն հեշտ է հասկացվում :

Ծնողների վարքը կարող է հանդիսանալ ուրույն չափանիշ, որի հիման վրա երեխաները համեմատում և կառուցում են իրենց վարքագիծը: Ծնող-երեխա փոխհարաբերությունների կառուցման մեջ ակտիվ կողմը հասուն մարդն է՝ ծնողը: Նա նպատակաուղղված կազմակերպում է փոխգործակցումը, ուղղորդում է այն՝ ենթարկելով կոնկրետ նպատակի: Կարևորն այստեղ այն է, թե ինչպիսի պայմանների վրա է ուշադրությունը կենտրոնացնում ծնողը հարաբերությունները կառուցելիս:

Ծնող-երեխա հարաբերությունների և երեխայի մոտ անձնային որակների ձևավորման միջև գոյություն ունի ուղիղ կապ, քանի որ ընտանեկան միջավայրը ծնողների անհատական առանձնահատկությունների, ընտանիքի բնակության պայմանների և դաստիարակության ոճերի համակցություն է:

Երեխաների վրա ազդում են ոչ միայն կանխամտածված և նպատակաուղղված դաստիարակչական ներգործությունները, այլ ավելի շատ ծնողների վարքագծի առանձնահատկությունները: Ընտանիքը

երեխայի համար ստեղծում է սոցիալական վարքի որոշակի մոդելներ: Գնահատելով այն, ինչ տեղի է ունենում հասարակությունում, երեխան, առաջին հերթին, հենվում է մոտ հարազատների հետ շփման փորձի վրա: Հետագայում նա իր փոխհարաբերություններն այլ անձանց հետ կառուցում է՝ զգալիորեն օգտագործելով ընտանեկան հաղորդակցման մոդելները: Ընտանիքում երեխաների սկզբնական սոցիալականացումը հատկապես ծնող-երեխա հարաբերությունների ոլորտում նմանատիպը չունի ռեֆերենտային խմբերի այլ տեսակներում: Եթե նույնիսկ կրթական համակարգը լինել կատարյալ, այն չէր կարող երեխայի համար ապահովել այն հատուկ ծնողական հոգատարությունը և սերը, որը գոյություն ունի ընտանիքում:

Ընտանեկան փոխհարաբերություններն ընտանիքի անդամների միջև վերապրվող սուբյեկտիվ հարաբերություններ են, որոնք համատեղ կենսագործունեության և շփման արդյունքում օբյեկտիվորեն արտահայտվում են անձանց փոխազդեցության ձևերում: Առանձնացվում են ընտանեկան փոխհարաբերությունների հետևյալ տեսակները.

Դիկտատորա - ծնողներից մեկի գերիշխող դիրք, որն արտահայտվում է խիստ պահանջների, կանոնների, հրամանների, բռնության, սպառնալիքների և ընտանիքի մյուս անդամների վրա ներգործության այլ միջոցների կիրառմամբ: Ծնողները բախվում են երեխայի դիմադրությանը, որը հարկադրանքին, սպառնալիքներին պատասխանում է իր հակազդման միջոցներով՝ կեղծավորությամբ, խաբեությամբ, կոպտության պոռթկումներով, իսկ երբեմն էլ՝ բացահայտ ատելությամբ: Բայց եթե նույնիսկ դիմադրությունը կոտրվում է, ապա դրա հետ միասին կոտրվում են նաև անձի արժեքային շատ կարևոր որակները՝ ինքնուրույնությունը, ինքնագնահատականը, նախաձեռնողականությունը, հավատն իր և իր հնարավորությունների նկատմամբ:

Խնամարարություն - երեխայի նկատմամբ չափազանց մեծ ուշադրություն, դժվարություններից նրան ազատում, հոգատարություն և անհանգստություն: Երեխայի զարգացումը խոչընդոտվում է, առաջանում է կախվածություն, նա չի կարողանում դիմակայել կյանքի դժվարություններին, ինքնուրույն գործողություններ կատարել, ընդունել որոշումներ: Ծնողներն ըստ էության արգելափակում են հարազատ տանից դուրս իրականության հետ բախվելու՝ երեխաների

պատրաստվածության գործընթացը: Հենց այս երեխաներն են, որ ավելի դժվար են հարմարվում խմբերում:

Խաղաղ գոյակցություն – ծնողների դիրքորոշում, ըստ որի պահպանվում են հետևյալ սկզբունքները՝ երեխաները պետք է մեծանան ինքնուրույն, անկախ, ազատ, հանգիստ: Այդպիսի ընտանիքներում ծնողներն ապրում են իրենց, երեխաներն էլ իրենց կյանքով: Այսօրինակ փոխհարաբերությունների հիմքում ընկած է ծնողների՝ որպես դաստիարակողների պասիվությունը, իսկ երբեմն էլ՝ նրանց հուզական սառնությունը, անտարբերությունը, անկարողությունը և ծնող լինելու ցանկության բացակայությունը:

Համագործակցություն – անձնային մակարդակում ծնողների և երեխաների փոխգործակցում, սիրո, հարգանքի և երեխայի նկատմամբ պահանջկոտության հավասարակշռվածություն: Հենց այս իրավիճակում է հաղթահարվում երեխայի եսասիրական անհատականությունը: Ընտանիքը, որտեղ փոխհարաբերությունների գերիշխող տեսակը համագործակցությունն է, որտեղ ծնողները երեխաների հետ շփվում են որպես անհատների հետ, որտեղ յուրաքանչյուրը կարող է դիմել մեկ ուրիշին խնդրանքով կամ հարցով և ստանալ օգնություն, ձեռք է բերում հատուկ որակ: Այդ պատճառով փոխգործակցության տվյալ տեսակը խթանում է երեխայի ստեղծագործական ակտիվությունը, ձևավորում է փոխըմբռնման պատրաստակամություն, առաջացնում է հոգեբանական անվտանգության զգացում:

Ծնողների հետ շփման երեխայի ներքին պահանջմունքը դրսևորվում է նրանով, որ նա հասակակիցների միջավայրում իր վարքով նմանակում է ծնողների շարժումները, պահվածքը, արժեքային գնահատականները և մտածողության ձևերը: Այդպիսի նմանակումը անվանում են *նույնականացում /իդենտիֆիկացիա/*: Երեխան կարծես իր մեջ վերակերտում է ծնողի կերպարը:

Մեծահասակների հետ շփվելիս երեխան հաճախ բարոյական արժեքներն ըմբռնում է կատեգորիկ ձևով՝ աստիճանաբար վերամշակելով և լրացնելով դրանք կոնկրետ բովանդակությամբ, որն էլ և արագացնում է նրանց ձևավորումը և դրա հետ մեկտեղ առաջացնում դրանց ձևական յուրացման վտանգը: Դրա համար կարևոր է, որ երեխան սովորի կիրառել դրանք կյանքում իր և այլոց նկատմամբ: Դա էական նշանակություն ունի, առաջին հերթին, նրա անձնային որակների ձևավորման համար: Որպես

վարքի չափանիշներ՝ նախադպրոցական տարիքի երեխայի համար հատուկ նշանակություն ունեն հեքիաթի հերոսները, որտեղ կոնկրետ կերպարային և իրեն հասանելի ձևով ընդգծված են բնավորության դրական և բացասական գծերը, ինչը հեշտացնում է երեխայի նախնական կողմնորոշումը մարդու անձնային որակների բարդ նկարագրում:

Երեխայի անձը ձևավորվում է աշխարհի հետ իրական փոխազդեցության արդյունքում: Այդ գործընթացը ղեկավարվում է մեծահասակների կողմից, որոնք նպաստում են սոցիալապես կարևոր հատկությունների ընտրությանը և մշակմանը: Երեխայի ինքնուրույնությունը դրսևորվում է այն դեպքում, երբ նա կիրառում է բարոյական գնահատականներն իր և այլոց նկատմամբ ու դրա հիման վրա կարգավորում է իր վարքը: Դա նշանակում է, որ ձևավորվում է անձնային այնպիսի բարդ ֆենոմեն, որն է *ինքնագիտակցությունը*:

Շփվելով մայրիկի և հայրիկի, եղբայրների և քույրերի հետ՝ երեխան յուրացնում է աշխարհի հետ կապը, մտածում և խոսում է այնպես, ինչպես մտածում և խոսում են իր ընտանիքում: Մեծանալով նա կարող է գիտակցաբար չընդունել իր ընտանիքին բնորոշ գծերը, սակայն ենթագիտակցաբար իր մեջ կրել ընտանիքի ներդրած վարքագծի կանոնները և կարծրատիպերը: Այս ամբողջը՝ կյանքի ոճը, հատկությունների, վարքի և ունակությունների յուրօրինակ համադրությունը համակցության մեջ որոշում են երեխայի ճանապարհը դեպի իր կյանքի նպատակները:

Ծնողական դերերի կատարման գործընթացում ամուսինների փոխհարաբերությունները կախված են նրանից, թե ինչպիսի ռազմավարություն ունեն նրանք: Եթե նրանց նպատակը իրենց հարաբերությունների լավացումն ու երեխաների ներդաշնակ զարգացումն է, ապա երեխաների մոտ նրանք հանդես են գալիս «միասնական ճակատով»: Նրանք չեն թուլացնում մոր կամ հոր հեղինակությունը երեխայի աչքերում, պաշտպանում են մյուս ամուսնու պահանջները և գործողությունները: Եվ, հակառակը, ամուսինները կարող են պատերազմել միմյանց հետ՝ դրանում ներքաշելով նաև երեխաներին:

Փորձնականորեն բացահայտվել են դաստիարակչական գործառույթն իրականացնելիս ամուսինների փոխգործակցության տարբեր ռազմավարություններ.

1. Ծնողների ջանքերի համակցություն. մայրը և հայրը միասին գնում են միևնույն ուղիով՝ օգնելով և լրացնելով միմյանց:

2. Հայրը հանդես է գալիս մոր օգնականի դերում (մայրը գլխավոր դաստիարակն է, իսկ հայրը աջակցում և օգնում է նրան):

3. Հայրն օգտագործում է երեխային, որպեսզի ցույց տա իր իշխանությունը և գերակայությունը կնոջ նկատմամբ (օրինակ՝ բացահայտ ծիծաղում է, երբ երեխան չի լսում նրան, կամ հեգնանքով է արծագանքում նրա պահանջների ձևակերպմանը):

4. Մայրը գաղտնի ոչնչացնում է հոր ազդեցությունը երեխայի վրա (հոր բացակայության ժամանակ թույլ է տալիս նրան անել այն, ինչը հայրն արգելում է, կամ նույնիսկ ուղղակի ասում է. «Սպասի՛ր, հայրիկը կգնա, և ես թույլ կտամ միացնել համակարգիչը»):

5. Մայրը միջնորդ է հոր և երեխայի միջև. երեխան և հայրը շփվելու ժամանակ չունեն, կամ նրանք չեն հասկանում իրար, կամ երեխան վախենում է խոսել հոր հետ, և մայրն օգնում է նրանց կարգավորել հարաբերությունները: Այստեղ կարևոր է հիշել՝ իրական ներդաշնակ հարաբերությունները ծագում են ուղիղ շփման դեպքում, այդ պատճառով այսպիսի ռազմավարությունը հնարավոր է միայն որպես ժամանակավոր միջոց:

6. Ծնողներն ունեն երեխայի վրա ազդելու տարբեր նպատակներ (օրինակ՝ մայրը, խղճալով լացող երեխային, մտածում է նրա թուլեական վիճակի մասին, իսկ հայրը, նրա նկատմամբ լինելով խիստ, մտածում է նրա ապագայի մասին) :

Այս տարբեր ռազմավարություններն առաջացնում են փոխհարաբերությունների բազմաթիվ ենթաձևեր ինչպես ամուսինների, այնպես էլ ծնողների և երեխաների միջև:

Քանալի բառեր՝ կարծրատիպ, ավտոկարծրատիպեր, հետերոկարծրատիպեր, ծնողական վարք, դաստիարակության ոճ, դիկտատուրա, խնամատարություն, խաղաղ գոյակցություն, համագործակցություն, փոխգործակցության ռազմավարություն, իդենտիֆիկացիա, ինքնագիտակցություն:

Օգտագործված գրականություն

1. Андреева Г.М., Социальная психология / Г.М.Андреева, М. , АСПЕКТ-ПРЕСС, 1999,375 с.
2. Андреева Т.В., Семейная психология: Учебное пособие, СПб, Речь, 2005.
3. Андреева Т. В. , Психология семьи / Т. В. Андреева, М., Речь, 2010.
4. Антонов А.И., Социология семьи. Учебник, - 2-е изд., перераб. и доп., М., ИНФРА , М, 2005, 640 с.
5. Арутюнян М.Ю., Гендерные отношения в семье // Материалы Первой Российской летней школы по женским и гендерным исследованиям «Валдай - 96», М., 1997, С. 56-57.
6. Басс Д., Стратегия выбора партнёра // Сексология: Хрестоматия, СПб., 2000. – 437. с.
7. Бодалев А.А., О социальных эталонах и стереотипах и их роли в оценке личности / А.А. Бодалев, В.Н. Куницына, В.Н. Панферова // Человек и общество: (ученые записки НИИКСИ), Л., изд-во Л. ун-т, вып. 9, 1971.
8. Буренкова Е.В, Хомиченко Е.Н., Влияние идеального образа партнёра на межличностные отношения в парах. // Семейная психология, 2007 г., №1, с. 43-55.
9. Волкова А.Н., Штильбанс В.И., На пороге семьи,Л., Знание, 1989.

THE ROLE OF FAMILY STEREOTYPES IN THE STRUCTURE OF PARENT-CHILD RELATIONSHIP

L. N. KURKCHYAN

*PhD in Pedagogical Sciences, Associate Professor
GSU Lecturer*

A. V. VAHANYAN

*Assistant at the Chair of Pedagogy and Psychology
Faculty of the Humanities, Haybusak University of Yerevan*

One of the contemporary issues of age and pedagogical psychology is presented in the article: the role of family stereotypes in child-upbringing. Parental behavior can be a unique criterion based on which a child compares and builds his / her behavior. Growing up, he/she can not consciously ignore his/her family-specific traits, but subconsciously carry the family's behavioral rules and stereotypes.

РОЛЬ СЕМЕЙНЫХ СТЕРЕОТИПОВ В ДЕТСКО-РОДИТЕЛЬСКИХ ВЗАИМООТНОШЕНИЯХ

Л. Н. КУРКЧЯН

Кандидат педагогических наук, доцент, ГГУ преподаватель

А. В. ВАГАНЯН

Ассистент кафедры педагогики и психологии

Ереванского университета “АЙБУСАК”

В данной статье обсуждается одна из острых проблем возрастной и педагогической психологии: семейные стереотипы и их роль в воспитании детей. Родительское поведение может стать основным критерием подражания для ребенка, который став взрослым, может, сознательно отвергая на подсознательном уровне, воспроизвести поведенческие модели своих родителей.